



Uunga siunnersuut: Tuniniaanissamik nittarsaassisarneq aamma nalu-naaqutsersuisarneq pillugu Inatsisartut inatsisaat nr. xx, xx 2014-imeersoq (tuniniaanissamik nittarsaassisarnermut inatsit)

(Inuussutissarsiornermut Aatsitassanullu Naalakkersuisoq)

(Siullermeernera)

Demokraatini tunngaviusumik nuannaarutigaarput tuniniaanissamik nittarsaassisarnermut allgartaliisarnissamullu inatsit. Inatsisip siunertaatut oqaatineqarsinnaavoq, niuertut pissuserissaarnerulissasut. Nuannaarutigaarput meeqqat inuusuttullu illersorneqarnissaat inatsimmut ilanngunneqarmat aamma nuannaarutigaarput attaveqaatigiinnermi atortut nutaaliat inatsisip ilusilersornerani aamma ilanngunneqarsimammata.

Pissutsilli assigiinngitsut pissutigalugit inatsisissatut siunnersuummi § 8 akerleraarput, tassani pineqarput oqaatsit.

Siullermik isumaqarpugut aalajangersakkami niuertut nunaqavissut internet atorlugu niuertunut naleqqiullugit ajornerusumik pineqartut, taakkumi assigiimmik piumasaqarfigineqanngillat. Tamatuma kinguneranik sumiiffimmi niuertarfiuteqarnissaq imaannaannginnerulissaaq, tamannalu atuisunut aamma kinguneqarnerluttussaavoq.

Oqaatsinullu tunngatillugu piumasaqaatinut akerliunitsinnut pissutaanerpaavoq isumaqaratta, sumiluunniit nunami naalakkersuisuusut akuleruffigisussaangikkaat, oqaatsit suut atorlugit niuertarfiit pilerisaarusiussanersut. Isumarpugut naapertorlugu naalakkersuisut inatsisiliorfigisinnaasaasa avataaniippoq taanna.

Demokraatini isumaqarpugut inuutissarsiortut ataasiakkaat namminneq aalajangertussaagaat, qanoq iliorlutit suut aningaasannaniutigissanerlugit. Tassani pingaaruteqarpoq eqqaamassallugu pilerisaarusiortarnermut pissutaasoq tassatuaammat inuit pisitinniarnissaat. Taamaattumik niuertut soqutigisaraat namminneq aalajangissallugu pilerisaareriaaseq suna isertitsissutiginerpaassanerlugu.

Niuertarfiuteqartuuguma pilerisaarusiussagaluarpunga kalaallisut dansisullu allallugit, pilerisaarutikka amerlanerpaanut paaseqqullugit, kisianni uanga allalluunniit naalakkertussaangilagut niuertut qanoq niuertuussanersut aamma pilerisaarutaat allalluunniit qanoq isikkoqassanersut aamma susassarinnilarput.

Taamaattumik Demokraatini inassutigaarput § 8 inatsimmit peerneqassasoq.

Taamatut allannguutissamik siunnersuuteqarluta inatsisissatut siunnersuut ilalerparput inassutigalugulu Inuutissarsiornermut Ataatsimiititaliamut ingerlatinneqassasoq.